

序

木根不厚則其長也不大水源不深則其流也不遠若恃其根厚源深而不加培養疏濬之功則高或摧而流或滯矣鎮南君諱終生定宗大王第六男而世祖丙戌以鎮南謹慎宗室中最賢特命爲司甕院提調睿宗戊子以其子復爲翊戴功臣陞嘉德大夫例封純忠積德補祚功臣成宗贈謚夷簡公恭謹好德不喜聲色教子有方時宗室鮮任事而長男居平君復爲節度使次男進禮君衡爲吏曹叅判次男鳳城君倅李男金山君衍爲兵曹叅議人皆榮之此乃鎮南君孺之以忠孝之氣脉涵之以道義之潤源也子孫莫不繼述代出名人傳之五世而不斬垂之百代而餘芳不歇其積蔭之功如木高而不摧水流而不滯是積善之家必有餘慶也公墓在於廣州論峴而以都市計劃壬子六月移窆

于龍仁郡驛北里設石儀豎神道碑基下又建九星齋結構精密
簷楹通敞近通綠野遠連碧天鬱然而峙於東者太和山悠然而
流於南者金良川松林含翠烟雲曳紫窈然一區佳境也巨役既
畢後孫弘淳等不憚心勞繼以蒐集先代文獻附以九星齋落成
韻題曰世錄付於剞劂以爲傳世之資可謂有是祖而有是孫靈
芝醴泉自有本源矣余感公之積蔭後孫之誠意不拘辭拙謹叙

癸丑八月下澣

前臺市長參議院議員 宗人 範昇 識

跋

右書吾門世錄而先祖鎮南君 事蹟也已經數百年尚未收拾
不得而詳故後孫弘淳敏淳等收錄國朝實錄中所載府君事實
及碑文齋舍記落成賀詩合爲一冊更附府君子孫之事蹟也我
太祖化家爲國開萬世之洪業而纔過二十七君寶祚絕於庚戌
我先祖守分齊家保八旬之令名而安過四百餘年幽宅遷於壬
子真所謂天有不測風雨人有朝夕禍福也先祖謙恭好學雖處
靖難之世無事安過幽宅在廣州論峴而因都市計劃移窆于龍
仁驛北里豎碑而表其仁厚之蹟建齋而備齋沐之所於是乎爲
先之事畢矣松楸鬱密山川窈窕光生蔓草之荒墟丹楹載臭名
高王室之宗英玄珉彌堅爲吾諸宗而居是齋者瞻丘隴而思程
氏之世葵感霜露而講晦翁之家禮怵焉而勗焉永謀守護之方

庶安陟降之靈常感羹牆之思不忘堂構之心各稱其道則庶不
負先祖之遺訓而天理人情並行也將付于子民請于宗人範昇
氏弁其卷首之文余雖不肖主其事故不拘荒辭敢書于後

癸丑八月下旬

十九代孫

圭熙

謹書